

Concurso de relatos y poemas en aragonés ribagorzano
CONDAU DE RIBAGORZA Ayuntamientos de Estadilla, Fonz y Graus

Trozos de tiempo
Celia Naval

Edición 2016
Poema accésit

I

Tiengo estransida l'alma,
pa yo que é llastre, el cuerpo
m'encordella y m'apreta.
¡Sobran toz los llímites
que afogan sentimientos!.

Si rio... porque rio,
si plloro... porque plloro.

Si plloro me sereno
y si rio m'acongojo.

Nada tiene sentido
en este trozo tiempo
y no ñ'hay puerta
y no quiero está endentro.

Aunque estizone el fuego
ya no trobo rescoldo
tó s'ha tornau ceniza
que escupe un fumo negro.

Y tó m'escuece.

II

¿En d'on está ixé cierzo
que arrastra y que s'en lleva

chemecos y suspiros?
¡qué me los cambie en cantos,
baldeos de campanas y
girigays de crios!.
Me entretiengo en la pena
en d'on no m'acomodo.
He de buscá las puertas,
he d'obrí ventanals,
he de corré cerrollos.
Esperanzada,
soltaré los cremallos,
con ojos y con manos,
m'he reclamaré al cielo
brincaré de l'enruena
y m'en subiré entalto.
¡Ay! sin brencia sol
qué esplatera é la lluna!
y que negra la noche...
Fa que relluzca l'alma
como los fuegos fatuos
en los foraus eternos.

III

Solo y sin rasmia
no bulle l' encanterio.
¡qué llueva aigua embriuada
que brinque entre las peñas!
¡qué me ruixe y m'estobe!
¡qué remuixe la tierra!.

Aigua embuixada...
¡Qué feiga brotá vida
que te traiga con ella!
que fén rodá estricalle
las piedras del recuerdo
que las torne en farina
que mos endulce
y alimente el reencuentro.
¡Qué llarga que é la vida
cuan s'está medio muerto!
Y que chicó resulta
cualquier trozo de tiempo.